

Ini Sa Igsulat I MALAKIYAS

Ini Denu Sa Igsulat I Malakiyas

Si Malakiyas sa tegesugkow kagi i Nemula. Egoh i Sakaliyas migsabuh egsugkow sa kagi i Nemula, lima pulù gepalay pa sa egoh i Malakiyas nekesambì. Egoh iya, nesakup pelawà sa kedatuan sa datù tegePélsiya sa tanà Huda, dodoo melanìh doo sa keugpà da diyà sa tanà Huda.

Egoh i Malakiyas migsugkow sa kagi i Nemula, egpauk sa medoo Hudiyu owoy endà egpangunutan da duu sa mepion adat kesimbà. Endà ma egpangunutan da duu sa medoo uledin i Nemula. Huenan di, inindaw i Malakiyas kagda anì mesenulê da owoy pelikù da ma diyà si Datù Nemula, sa Nemula épê dakeh kehidu owoy anan metudà sa egbaelan di. Basa ko Isdela kansad 10 owoy Nihimiyas kansad 13 denu sa binaelan sa medoo Hudiyu egoh da migdineg sa kagi i Nemula igsugkow i Malakiyas.

1 ¹Na, ini sa kagi i Datù Nemula igsugkow i Malakiyas diyà sa medoo tegeIslaél.

Ini Denu Sa Kehidu I Nemula Diyà Sa Medoo TegeIslaél

²Na, mig-ikagi Nemula i diyà sa medoo etaw di, guwaen di, “Tapay dé eghiduwan ku kiyu edung egoh anay.”

Dodoo migsagbì da, guwaen da, “Enù sa ukit kehidu ko kenami?”

Migsagbì Nemula i, guwaen di, “Taa yu si Isaw owoy si Hakob, telahadi da. Eghiduwan ku Hakob i owoy sa medoo tugod di, ³dodoo egkelepuhan ku atung Isaw i owoy sa medoo tugod di owoy pinedaetan ku sa medoo getan diyà sa tanà di. Binaluy ku melabel tanà mediyù dalesan sa tanà di, owoy pinandayà ku sa medoo uled tanà anì umugpà da dahiya.”

⁴Na, amuk mikagi sa medoo tugod i Isaw tegeIdom, guwaen da, “Apiya di pa nedaetan sa medoo menuwa ké, baelan ké doo dulì.”

Dodoo ini sa sagbì i Datù Nemula, guwaen di, “Apiya baelan yu dulì, lukaten ku mendaa taman sa egoh di pengadanan sa medoo liyu etaw

Medaet Menuwa iya wé kenà yu, owoy pengadanan da ma Menuwa Egkelanggetan i Nemula Taman Melugay.”

⁵O medoo tegeIslaél, amuk hauwen yu ini i, mikagi yu, guwaen yu, “Épê dakel egkegaga Datù Nemula i, apiya diyà sa liyu tanà beken diyà siini tanà Islaél daa.”

Ini Sa Egoh I Nemula Migsigbolow Diyà Sa Medoo Tegesimbà

⁶Na, mig-ikagi Datù Nemula i épê dakel egkegaga diyà sa medoo tegesimbà, guwaen di, “Taa yu sa anak, eg-adatan di sa emà di. Owoy hediya ma sa udipen, eg-adatan di ma sa datù di. Dodoo aken i emà yu, maen di ya endà eg-adatan yu duu aken? Owoy aken ma sa datù yu, dodoo endà egpangnutan yu duu aken. Egtabiyaen yu aken, dodoo tapay yu doo umigsà, guwaen yu, ‘Enù sa ukit ké egtabiya keniko?’

⁷“Iya sa ukit ketabiya yu kenak sa kebegay yu sa tètê kaenen diyà sa atung kenà yu eg-ulow sa igbegay yu diyà kenak.

“Agulé umigsà yu doo tapay, guwaen yu, ‘Ngadan sa ukit ké endà eg-adat diyà keniko?’

“Endà eg-adat yu diyà kenak danà yu migtabiya sa atung kenà yu eg-ulow sa igbegay yu diyà kenak. ⁸Enù di ya, pinenemdem yu pa amuk enget sa binaelan yu egoh yu mig-uwit sa hinagtay langap anì ibegay yu diyà kenak? Enù di ya, pinenemdem yu pa amuk enget sa binaelan yu egoh yu egbegay sa lepù hinagtay owoy sa eglinadu? Tukaw yu begayi diyà sa ulu-ulu yu sa éhê iya wé. Hauwen ta i amuk metuuwan diyà keniya owoy amuk tabangan di kiyu. Aken si Datù Nemula eg-ikagi ini i.

⁹“Hediya ma kiyu i medoo tegesimbà, tukaw yu pegeni diyà si Nemula sa kehidu di diyà keniya. Dodoo endà sagipaen ku duu sa kesimbà yu danà yu mig-amu egbegay diyà kenak. Aken si Datù Nemula sa eg-ikagi ini i.

¹⁰“Iya sa ungayà ku pintuan yu dé sa medoo bengawan sa Dalesan i Nemula, anì endà dé taguan yu duu apuy sa atung kenà yu eg-ulow enù ka endà dé duen ulan di diyà sa kehaa ku. Endà egketuuwan a diyà keniya, owoy endà ma sakemen ku duu sa medoo ibegay yu. Aken si Datù Nemula épê dakel egkegaga sa eg-ikagi ini i. ¹¹Apiya sa medoo etaw diyà sa langun balangan tanà diyà siini sinukub langit, eg-adatan da doo sa ngadan ku edung magtu simag taman sumigep. Owoy muni dé kenà sa menuwa diyà siini uwang tanà, eg-ulow da sa lana mepion ngadeg owoy egbegay da ma sa mepion diyà sa kehaa ku, enù ka eg-adatan da sa mapulù ngadan ku. Aken si Datù Nemula sa eg-ikagi ini i.

¹²“Dodoo kiyu, endà eg-adatan yu duu aken danà yu eg-ikagi endà duen ulan sa atung kenà yu eg-ulow owoy danà yu ma egbegay sa medoo kaenen endà mepion di diyà sa kehaa ku. ¹³Owoy eg-ikagi yu ma, guwaen yu, ‘Egtepal ké dé egbael ini i,’ owoy egkelepuhan yu ma sa

uledin ku. Egbegayan yu aken sa medoo hinagtay pinenakaw yu ataw ka lepù ataw ka sa eglinadu. Enù di ya, iya sa penemdem yu sakemen ku iya wé? Aken si Datù Nemula sa eg-ikagi ini i.

¹⁴“Mepigtamayan ku sa etaw tegelipul enù ka igpasad di ibegay sa mepion hinagtay di diyà kenak, dodoo iya polo sa igbegay di diyà kenak sa medaet. Na, sebaen ku daa sa Datù épê dakel egkegaga owoy melimedangan diyà kenak sa langun etaw diyà sa medoo balangan tanà. Aken si Datù Nemula épê dakel egkegaga sa eg-ikagi ini i.”

Ini Sa Sasà I Nemula Diyà Sa Medoo Tegesimbà

2 ¹Agulè mig-ikagi Datù Nemula i épê dakel egkegaga, guwaen di, “Na, duen sa isugù ku diyà keniyu, kiyu i medoo tegesimbà. ²Taa yu, hih. Mepion amuk tigtu adatan yu aken. Dodoo amuk endà duminegdineg yu diyà kenak, owoy amuk endà adatan yu duu aken, tubaden ku kiyu. Tubaden ku ma sa medoo mepion nekuwa yu danà di kiyu sa tegesimbà. Taa yu, tinubad ku dé iya wé enù ka endà migpangunut yu diyà sa igsugù ku. ³Indawen ku sa medoo tugod yu owoy idulèt ku diyà sa palas yu sa légét sa medoo hinagtay ibegay yu diyà kenak, owoy ipeunut ku ma kiyu diyà iya wé ibuung ku. ⁴Amuk hediya, metiigan yu doo kedu diyà kenak siini sasà anì tapay doo meeles sa nesesasadan ké sa medoo tegesimbà tugod i Lebi. Aken si Datù Nemula épê dakel egkegaga sa eg-ikagi ini i.

⁵“Nesesasadan ké sa medoo tugod i Lebi anì kumelalù da owoy anì kumelanìh ma sa pedu da. Iya sa igbegay ku diyà kenagda anì adatan da aken. Tuu ma doo, eg-adatan da aken owoy egkelimedangan da ma diyà kenak. ⁶Igtulù da diyà sa medoo etaw sa tuu kagi dinineg da diyà kenak. Endà egbutbut da owoy endà eglipul da, dodoo egbaelan da polo sa mepion diyà sa kehaa ku owoy eg-ilingan da ma sa metudà adat, owoy medoo ma sa egtuluen da anì sumabuh da mael medaet.

⁷“Na, iya sa galebek sa medoo tegesimbà sa ketulù da sa tuu keketiig denu si Nemula. Mepion amuk mangay sa medoo etaw umigsà diyà kenagda denu sa ungayà i Nemula, enù ka kagda sa tegetulon sinugù i Datù Nemula épê dakel egkegaga. ⁸Dodoo kiyu i medoo tegesimbà, migsekê yu polo diyà sa tuu ketulù, enù ka danà sa ketulù yu, neenggat sa medoo etaw anì mael da salà. Tinipay yu sa nesesasadan ké sa medoo tugod i Lebi. ⁹Huenan di, pemaenen ku sa kekelepuh sa medoo tegeIslaél keniyu owoy pemalaen ku kiyu diyà sa kehaa da, enù ka endà pinangunutan yu duu sa ungayà ku owoy endà ma nesetepeng sa ukit ketulù yu sa uledin ku.”

Ini Sa Egoh Sa Medoo TegeIslaél Endà Egpetuu Sa Igpasad Da

¹⁰Enù di ya, netiigan yu pa sebaen daa sa Emà ta? Enù di ya, sebaen daa sa Nemula migbael kenita? Amuk hediya, maen di ya endà ipetuu sa

uman sebaen etaw diyà kenita sa igpasad ta diyà sa duma ta? Danà iya wé egbaelan ta, tinipay ta sa nesepasadan da i Nemula sa medoo tupù ta egoh anay. ¹¹Apiya dutu Islaél dò owoy diyà tanà Huda owoy menuwa Hêlusalém, tinipay sa medoo etaw sa nesepasadan da si Nemula enù ka binaelan da sa tigtu medaet diyà sa kehaa di. Tinétê da sa dalesan tigtu egkedakelan pedu i Nemula danà sa medoo maama migsawa sa medoo bayi egsembà diyà sa beken tigtu nemula.^a ¹²Mepion amuk mepigtamayan i Nemula sumalà dé sa etaw egbael iya wé anì mekedan diyà siini tanà ta, apiya di pa eg-uwiten di sa igbegay di uloy diyà si Datù Nemula épê dakek egkegaga.

¹³Ini ma sa egbaelan yu. Egtemù yu egsinegaw diyà sa atung kenà yu eg-ulow sa igbegay yu diyà si Nemula owoy egpehiduhidu yu ma, enù ka endà dé egketuuwan di diyà sa medoo igbegay yu diyà kenagdi owoy endà ma dé egsakemen di duu. ¹⁴Eg-igsà yu ngadan sa maen di endà egsagipaen di kiyu. Ini sa pesuwan di, netiigan di endà ipetuu yu duu sa igpasad yu diyà sa bayi sinawa yu egoh yu batàbatà pelà. Migpasad yu diyà si Nemula sa egoh yu mael mepion diyà sa sawa yu, dodoo endà ipetuu yu duu, apiya di pa igpetuu di sa hagdi igpasad. ¹⁵Beken sinesebaen i Nemula atu kiyu sa lawa yu owoy sa suguy yu ma? Enù ka iya sa ungayà di umanak yu anì mangunut da ma diyà kenagdi. Huenan di, tuliki ko sa pedu ko anì endà tipayen ko duu sa igpasad ko diyà sa bayi sinawa ko egoh yu batàbatà pelà.

¹⁶Mig-ikagi Datù Nemula i sa epgigtuuwen sa medoo tegelIslaél, guwaen di, “Egkelepuhan ku sa keseekeday yu, owoy endà ma meiyap a amuk baelan sa maama sa medaet diyà sa sawa di. Huenan di, tulik ka anì endà metipay ko duu sa igpasad ko diyà sa sawa ko.”

¹⁷Na, egtepal dé Datù Nemula i danà sa medoo eg-ikagiye yu.

Dodoo eg-igsà yu, guwaen yu, “Ngadan sa ukit ké egtepalan i Nemula?”

Iya sa ukit yu egtepalan i Nemula sa keikagi yu, guwaen yu, “Mepion doo diyà sa kehaa i Nemula sa etaw egbael medaet, owoy egketuuwan ma doo diyà kenagda.” Owoy egpetepalen yu ma kagdi danà yu eg-igsà, guwaen yu, “Kenà i Nemula i dé épê metudà adat?”

Medapag Dé Sa Agdaw I Nemula Lumigela Sa Langun Etaw

3 ¹Agulé mig-ikagi Datù Nemula i épê dakek egkegaga, guwaen di, “Haa yu, duen sa egsugùsuguen ku pehunawen ku anì tapayen di sa dalan ukitan ku. Agulé sa Datù eg-angat-angatan yu, petow dé tumbow diyà sa Dalesan i Nemula. Tigtu meketuu mangay dini sa egsugùsuguen ku sa eg-angat-angatan yu anì tulonen di sa kagi ku nekepasad.”

²Dodoo enday ta duu sa etaw meketigkel sa gai sa ketebow di. Owoy enday ta duu sa meketaeng amuk pehaa dé. Enù ka kagdi sa lagà apuy

^a 2:11 Mebaluy ma guwaen di, “danà da egpenemula sa medoo beken tigtu nemula.”

igtunag putow amuk tuu putow, owoy lagà ma sa tigtu mepion sabun mekekedan lued. ³Umangay dahini anì antangen di sa medoo tegesimbà, lagà sa etaw egtapis sa pilak owoy bulawan diyà apuy. Amuk hediya, mebaluy da dé megay diyà si Datù Nemula sa medoo tigtu mepion diyà sa kehaa di. ⁴Agulé metuuwan dema Datù Nemula i diyà sa uwiten sa medoo tegeHuda owoy tegeHélusalém sa ibegay da uloy diyà kenagdi lagà mendaa sa egoh anay.

⁵Agulé mig-ikagi Datù Nemula i épê dakel egkegaga, guwaen di, “Medapag a dé mangay diyà keniyu anì antangen ku. Owoy petuuwen ku mapes sa salà sa medoo épê lambus owoy sa medoo tegebìgà owoy sa medoo tegebutbut owoy sa medoo tegelugi sa eggalebek diyà kenagda, owoy sa medoo tegepelihay sa bayi balu owoy ilu, owoy sa medoo endà metudà eg-antang sa beken tigtu etaw diyà sa menuwa da, owoy sa medoo endà melimedang diyà kenak.”

Ini Denu Sa Kebegay Baed Diyà Si Nemula

⁶Agulé guwaen i Nemula, “Aken si Datù Nemula owoy endà mehali a. Huenan di, kiyu i medoo tugod i Hakob, endà pelà mepigtamayan yu imet, ⁷apiya di pa egpelononon yu sa uledin ku owoy takà yu ma migtipay edung egoh sa medoo tupù yu. Dodoo amuk pelikù yu diyà kenak, kuwaen ku doo kiyu. Aken si Datù Nemula sa eg-ikagi ini i.

“Dodoo umigsà yu, guwaen yu, ‘Ngadan sa baelan ké anì mekepelikù ké diyà keniko?’ ”

⁸Agulé guwaen i Nemula, “Umigsà a ma, enù di ya metudà pa egbaelan sa etaw amuk lipulen di Nemula i? Endà metudà di, dodoo eglipulen yu doo aken.

“Dodoo umigsà yu dema, guwaen yu, ‘Ngadan sa ukit kelipul ké keniko?’

“Denu sa sepulù pelesintu owoy sa medoo liyu ibegay yu diyà kenak.

⁹Netubad yu langun, enù ka eglugiyen sa medoo etaw diyà sa langun menuwa yu aken. ¹⁰Uwit yu langun sa niyu ibegay sepulù pelesintu anì megulub sa kailangan diyà sa Dalesan i Nemula. Baeli yu tukaw ini i. Agulé hauwen yu doo ukaan ku sa medoo tatawan diyà langit, owoy buwahan ku diyà keniyu sa mepion ketabang temù medoo. Aken si Datù Nemula épê dakel egkegaga sa eg-ikagi ini i. ¹¹Endà ma pandayaen ku duu sa medoo uled tanà pedaet sa medoo hinemula yu, owoy tigtu mebaluy ma kebunga sa medoo palas hinemula yu. ¹²Amuk hediya, umikagi sa medoo liyu etaw diyà sa langun balangan tanà, guwaen da binagian yu enù ka tigtu mepion kenà umugpà sa niyu tanà. Aken si Datù Nemula épê dakel egkegaga sa eg-ikagi ini i.”

Ini Denu Sa Kehidu Igpasad I Nemula

¹³Agulé guwaen i Datù Nemula, “Na, medaet sa inikagi yu denu kenak.”

“Dodoo eg-igsà yu, guwaen yu, ‘Ngadan sa medaet inikagi ké denu keniko?’

¹⁴“Iya sa inikagi yu, guwaen yu, ‘Endà duen ulan sa kepigtuu ta diyà si Nemula. Ngadan sa ulan sa kepangunut ta diyà sa medoo igsugù di? Ngadan ma sa ulan sa kepehaa ta diyà si Nemula épê dakel egkegaga sa kekebukul ta danà sa medoo salà ta? ¹⁵Dodoo hinaa ta sa medoo etaw hambug, kagda polo sa binagian, owoy egkekawasà ma doo sa medoo tegebael medaet. Owoy apiya di pa egtepengan da Nemula i danà sa medaet kebael da, endà doo egkepigtamayan da.’ ”

¹⁶Agulé egkeseolom sa medoo etaw épê kekelimedang diyà si Datù Nemula. Egoh i Nemula migdineg sa inikagi da, igpesulat di diyà sa sebaen libelu sa ngadan sa medoo etaw épê kekelimedang diyà kenagdi owoy eg-adat kenagdi.

¹⁷Agulé mig-ikagi Datù Nemula i épê dakel egkegaga, guwaen di, “Mebaluy kagda sa etaw ku. Amuk meuma sa agdaw ku sumetipon sa medoo etaw eghiduan ku, tigtu dé meetaw ku kagda. Ipaten ku kagda lagà sa kehidu sa maama sa anak di egpangunut diyà kenagdi. ¹⁸Amuk meuma iya wé, hauwen yu doo sa kenà di nesetigesa sa etaw metiengaw adat owoy sa tegebael medaet, owoy hediya ma, mesetigesa sa egpangunut diyà kenak owoy sa endà egpangunut.”

Ini Sa Agdaw Keligela I Nemula

4 ¹Na, mig-ikagi Datù Nemula i épê dakel egkegaga, guwaen di, “Taa yu, hih, meuma doo sa agdaw egoh sa medoo etaw hambug owoy sa medoo tegebael medaet meulow lagà sa legami ulowen. Amuk meuma iya wé agdaw, meulow da langun owoy endà duen mesamà diyà kenagda, apiya sebaen. ²Dodoo kiyu i medoo etaw épê kekelimedang diyà kenak, mealukan yu polo danà sa tunung ku lagà sa teleséng agdaw enù ka kedanan di sa medoo linadu yu. Sumautsaut yu danà yu meanggan lagà sa nati sapì pinelaun diyà sa lugenan di. ³Amuk meuma sa agdaw ku kumukum, ipeuyayà ku keniyu sa medoo tegebael medaet, owoy mekeiling da daa sa kepung tanà sadsadan yu. Aken si Datù Nemula épê dakel egkegaga sa eg-ikagi ini i.

⁴“Na, petulengtuleng yu sa igtulù i Mosis sa eggsuguen ku egoh di migsugkow sa medoo uledin owoy sa medoo sugù igbegay ku diyà kenagdi dutu siedò getan Holéb^b egoh anay anì pangunutan sa medoo tegeIslaél.

⁵“Taa yu, hih, peangayen ku diyà keniyu Iliyas i sa tegesugkow kagi ku egoh di endà pa tumebow sa agdaw i Datù Nemula, sa agdaw mekelimedang owoy mekegaip. ⁶Danà sa ketegudon di, meseunut sa pedu sa lukes owoy sa batà. Amuk endà meketuu iya wé, angayen ku pedaet sa uwang tanà yu.”

^b 4:4 Getan Sinay sa sebaen kepengadan sa getan Holéb.